



Tužilaštvo - Tužiteljstvo Bosne i Hercegovine
Тужилаштво Босне и Херцеговине

Broj: T20 0 KTK 0026649 25
Sarajevo, 04.04.2025. godine

SUD BOSNE I HERCEGOVINE
- Sudija za prethodno saslušanje -

Na osnovu odredbi člana 35. stav (2) tačka i) i odredbi člana 226. stav (1), u vezi sa odredbama člana 227. Zakona o krivičnom postupku Bosne i Hercegovine (u daljem tekstu ZKP BiH),
p o d i ž e m:

OPTUŽNICU

PROTIV:

ADIS PRAŠOVIĆ, rođen 1979. godine u Sarajevu, državljanin Bosne i Hercegovine,

AMER SELAK, rođen 1980. godine u Sarajevu, državljanin Bosne i Hercegovine

ŠTO SU:

1. Adis Prašović i Amer Selak - zajedno;

U vremenskom periodu od kraja 2021. godine do kraja septembra 2022. godine, na teritoriji Bosne i Hercegovine, Federacija Bosne i Hercegovine, na području Kantona Sarajevo, u svojstvu službenih lica u Federaciji, u smislu člana 2. stav (3) Krivičnog zakona Federacije Bosne i Hercegovine, kao policijski službenici Ministarstva unutrašnjih poslova Kantona Sarajevo (u daljem tekstu MUP Kantona Sarajevo), raspoređeni u Sektor kriminalističke policije i kao ovlaštena službena lica u smislu člana 20. tačka g) Zakona o krivičnom postupku Bosne i Hercegovine, koja imaju odgovarajuća ovlaštenja unutar policijskih organa u Bosni i Hercegovini i koja na osnovu člana 7., 30., 31., 33., 34. i 36. Zakona o zaštiti tajnih podataka („*Službeni glasnik Bosne i Hercegovine*“, broj: 54/05 i 12/09), po osnovu izvršenih sigurnosnih provjera imaju pristup tajnim podacima stepena INTERNO i POVJERLJIVO, u radu na predmetima MUP-a Kantona Sarajevo i Tužilaštva Bosne i Hercegovine „{...}“ sa određenim stepenom tajnosti INTERNO ..., po kojima su formirani predmeti u Tužilaštvu Bosne i

Hercegovine, broj: ..., iako svjesni svojih radnji, s ciljem pribavljanja protivpravne imovinske koristi, od „(...)“ i „(...)“, čije radnje su u ovim krivičnim spisima predmet policijske obrade i krivične istrage po krivičnim djelima iz stvarne nadležnosti Tužilaštva Bosne i Hercegovine, u više navrata zahtjevali i primali dar u vidu novca i druge koristi za sebe, da kao policijski službenici suprotno članu 43. stav (1) Zakona o policijskim službenicima Kantona Sarajevo („Službene novine Kantona Sarajevo“, broj: 38/2018, 26/2019 i 39/2020), te članu 11. stav (1) Zakona o zaštiti tajnih podataka („Službeni glasnik Bosne i Hercegovine“, broj: 54/05 i 12/09) neovlašteno otkriju činjenice i podatke, koje su bile označene stepenom tajnosti INTERNO, do kojih su došli u posjed kao policijski službenici u MUP-u Kantona Sarajevo, te ovlaštena službena lica u radu pod nadzorom tužioca Tužilaštva Bosne i Hercegovine, svjesni posljedica da bi njihovo otkrivanje moglo štetiti istragama Tužilaštva Bosne i Hercegovine i krivičnim postupcima pred Sudom Bosne i Hercegovine, te policijskom radu MUP-a Kantona Sarajevo, pa su:

- u vremenskom periodu od januara 2022. godine do početka mjeseca augusta 2022. godine, u više navrata, u neposrednim kontaktima sa „(...)“ na području Grada Sarajevo, općine Centar, na adresi ... ili drugim njima poznatim lokacijama, iako nisu bili oslobođeni obaveze čuvanja tajnosti podataka u skladu sa članom 43. stav (3) Zakona o policijskim službenicima Kantona Sarajevo, istome neovlašteno otkrili podatak da MUP Kantona Sarajevo raspolaže informacijama da je on korisnik kriptovane aplikacije SkyEcc, da bi mu u više navrata u različitim prilikama otkrivali prepiske i sadržaje komunikacija sa pin koda Sky ecc ..., te druge tajne podatke i informacije o aktivnostima koje su policijski službenici MUP-a Kantona Sarajevo preduzimali prema njemu u svojstvu osumnjičenog i drugim saosumnjicima ili drugim licima, pa su mu tako neposredno prije realizacije Naredbe Suda Bosne i Hercegovine, broj: ..., izdate po zahtjevu Tužilaštva od ..., otkrili informaciju da će ubrzo prema njemu i drugim saizvršiocima u ovom krivičnom predmetu biti preduzete radnja dokazivanja pretres i radnja lišenja slobode, da bi u istom vremenskom periodu od njega zahtjevali dar u vidu novca za sebe, da u okviru ovlaštenja lažnim prikazivanjem činjenica da se radi o predmetima čije dalje oduzimanje nije potrebno i tako od nadležnog organa izdejstvuju vraćanje privremeno oduzetih predmeta tačnije putničkih motornih vozila koji su ranijim radnjama dokazivanja nakon obavljenog uviđaja, privremeno oduzeti od „(...)“ i „(...)“ u svojstvu osumnjičenih, po zapisnicima o uviđaju, Ministarstva unutrašnjih poslova Kantona Sarajeva, broj: ..., za što su u opisanim kontaktima i na opisanim lokacijama primili novac u iznosima od 1000,00 Eura, a potom i 500,00 Eura i 500,00 KM, u ukupnom iznosu, u protuvrijednosti, od 3.425,00 KM;
- u vremenskom periodu od mjeseca januara 2022. godine do sredine mjeseca septembra 2022. godine, u više navrata, u neposrednim kontaktima sa „(...)“, na području Grada Sarajevo, općine Centar, na lokalitetu naselja Koševo, općine Stari Grad na lokalitetu naselja Vrbanjuša, Kovači i drugim njima poznatim lokacijama, kao i telefonskim kontaktima koje je ostvarivao Amer Selak, iako nisu bili oslobođeni obaveze čuvanja tajnosti podataka u skladu sa članom 43. stav (3) Zakona o policijskim službenicima Kantona Sarajevo, istome neovlašteno otkrili podatak da MUP Kantona Sarajevo raspolaže informacijama da su „(...)“ i „(...)“ korisnici kriptovane aplikacije SkyEcc, da bi mu u više navrata u različitim prilikama otkrivali prepiske i sadržaje komunikacija sa pin koda SkyEcc ..., čiji su korisnici bili „(...)“ i „(...)“, te druge tajne podatke i informacije o aktivnostima koje su policijski službenici MUP-

a Kantona Sarajevo preduzimali prema njemu u svojstvu osumnjičenog i drugim osumnjičenim ili drugim licima, pa mu je tako Amer Selak neposredno prije realizacije planiranih istražnih radnji pretresanja i radnje lišenja slobode prema „(...)“ i „(...)“, pod nadzorom tužioca Tužilaštva Bosne i Hercegovine, dana ..., u neposredno ostvarenom kontaktu saopćio i otkrio podatak o kapacitetima koje koriste policijski službenici MUP-a Kantona Sarajevo u postupanju u predmetima Tužilaštva Bosne i Hercegovine, zbog čega se na osnovu takvog podatka „(...)“ udaljio sa lokacije i prostorija koje koristi prije preduzimanja radnje lišenja slobode i radnje pretresanja prema istome, za što su u opisanim kontaktima i na opisanim lokacijama, u više navrata, primali novac u iznosima od 300,00 do 500,00 KM, na način da je isti po njihovom dogovoru od „(...)“ preuzimao Amer Selak, a koji su potom dijelili između sebe u njima poznatim iznosima, kao i ukupnom iznosu ovako primljenog dara, pa su tako opisanim radnjama, zajedno, stekli protivpravnu imovinsku korist u iznosu od najmanje 4.225,00 KM;

2. Adis Prašović i Amer Selak - zajedno;

U vremenskom periodu od sredine 2020. godine do kraja septembra 2022. godine, na teritoriju Bosne i Hercegovine, Federacija Bosne i Hercegovine, na području Kantona Sarajevo, u svojstvu službenih lica u Federaciji, u smislu člana 2. stav (3) Krivičnog zakona Federacije Bosne i Hercegovine, kao policijski službenici Ministarstva unutrašnjih poslova Kantona Sarajevo (u daljem tekstu MUP Kantona Sarajevo), raspoređeni u Sektor kriminalističke policije i kao ovlaštena službena lica u smislu člana 21. tačka g) Zakona o krivičnom postupku Federacije Bosne i Hercegovine, koji imaju odgovarajuća ovlaštenja unutar policijskog organa, iako svjesni svojih radnji i posljedica koje mogu nastupiti, sa ciljem pribavljanja protivpravne imovinske koristi, suprotno članu 41. stav (4) Zakona o policijskim službenicima Kantona („*Službene novine Kantona Sarajevo*“, broj: 38/2018, 26/2019 i 39/2020), po osnovu prethodnog dogovora sa advokatom „(...)“, kojem je posredovao i u kojem je učestvovao „(...)“, zahtjevali i primili darove u vidu novca, i to iznos od po 500,00 KM na ime angažmana advokata i zastupanja predmeta iz nadležnosti Općinskog suda u Sarajevu, a iznos od 1.000,00 KM po predmetu iz nadležnosti Kantonalnog suda u Sarajevu i neutvrđeni iznos procenta od ukupne naknade za zastupanje advokata pred navedenim sudovima, kako bi u prilikama službenog postupanja prema licima lišenim slobode ili osumnjičenim licima, u zadovoljenju njihovih prava propisanih članom 5. ZKP FBiH, za advokata kojeg mogu sami izabrati ili kojim će se advokat postaviti na njihov zahtjev, uzmu i zahtjevaju postavljanje advokata „(...)“, sve kako bi ovom advokatu stvorili uslove za naplatu naknada za zastupanje, što su i činili na način da su putem telefona pozivali advokata „(...)“, te prije njegovog dolaska u službene prostorije sugerisali licima lišenim slobode ili osumnjičenim licima da za zastupanje opunomoće ovog advokata, te potom zahtjevaju njegovo postavljanje kao branioca po službenoj dužnosti, nakon čega su od advokata „(...)“, a u prilikama neposrednih kontakata sa „(...)“, na različitim lokacijama na području Kantona Sarajevo, od ovog posrednika primali novac u iznosima od po 1000,00 KM na ime zastupanja lica „(...)“, „(...)“, „(...)“, „(...)“, „(...)“, „(...)“, „(...)“, „(...)“, „(...)“ i „(...)“, a iznos od po 500,00 KM na ime zastupanja lica „(...)“ i „(...)“, te neutvrđeni iznos novca kao dogovoreni procenat od ukupne naknade za zastupanje advokata pred navedenim sudovima, koji su potom u njima poznatim iznosima dijelili između sebe, te na takav način zajedno stekli protivpravnu imovinsku korist u iznosu od najmanje 11.000,00 KM.

3. Adis Prašović - sam;

U vremenskom periodu od 12.07.2022. godine do 26.09.2022. godine, u službenim prostorijama Ministarstva unutrašnjih poslova Kantona Sarajevo (dalje u tekstu MUP Kantona Sarajevo), na adresi ... općina Centar, Grad Sarajevo, kao službeno lice u Federaciji u smislu člana 2. stav (3) Krivičnog zakona Federacije Bosne i Hercegovine, kao policijski službenik MUP-a Kantona Sarajevo, raspoređen u Sektor kriminalističke policije, koji ima odgovarajuća ovlaštenja unutar policijskog organa u skladu sa članom 2. Zakona o policijskim službenicima Kantona Sarajevo („Službene novine Kantona Sarajevo“, broj: 38/2018, 26/2019 i 39/2020) i postupanju kao ovlašteno službeno lice u smislu člana 20. tačka g) Zakona o krivičnom postupku Bosne i Hercegovine, iako svjestan svojih radnji i posljedica koje mogu nastupiti, sa ciljem pribavljanja protivpravne imovinske koristi, iskoristio svoj službeni položaj i prekoračio granice svojih ovlaštenja, na način da je kao policijski službenik MUP-a Kantona Sarajevo, svjestan i znajući da se radi o privremeno oduzetim predmetima po Naredbama Suda Bosne i Hercegovine, broj: ..., čije je čuvanje i deponovanje bilo određeno u prostorijama MUP-a Kantona Sarajevo, a kojim naredbama je u istom svojstvu istovremeno i postupao u radnjama pretresanja i privremenog oduzimanja predmeta, postupajući suprotno članu 35. stav (3), 36. i 71. Zakona o krivičnom postupku Bosne i Hercegovine, u službenoj prostoriji broj 58., u toku radnog vremena i van radnog vremena, u više navrata pristupao privremeno oduzetim predmetima koji su se nalazili u metalnoj kasi, a koji su bili osigurani i imaju status dokaza, na način da je, bez prethodnog upoznavanja i odobrenja tužioca:

- otvorio papirnu vreću, osiguranu kao dokaz, u kojoj se nalazio novac privremeno oduzet od „(...)“ po Potvrdi, Ministarstvo unutrašnjih poslova Kantona Sarajevo, broj: ... iz koje je prisvojio:
 - Dvadeset (21) novčanicu u apoenima od 100 KM, sljedećih serijskih brojeva: „{...}“;
 - Stotinuijedna (101) novčanicu u apoenima od 50 KM, sljedećih serijskih brojeva: „{...}“;
 - Deset (10) novčanica u apoenima od 200 EURA, sljedećih serijskih brojeva: „{...}“;
 - Četrdesetosam (48) novčanica u apoenima od 100 EURA, sljedećih serijskih brojeva: „{...}“;
 - Jedna (01) novčanica u apoenu od 50 EURA, sljedećeg serijskog broja: ...;
 - Jedna (01) novčanica u apoenu od 05 EURA, sljedećeg serijskog broja: ...;
- otvorio papirnu vreću, osiguranu kao dokaz, u kojoj se nalazio novac privremeno oduzet od „(...)“, privremeno oduzet po Potvrdi, Ministarstvo unutrašnjih poslova Kantona Sarajevo, broj: ..., iz koje je prisvojio:
 - Tridesetsedam (37) novčanica u apoenu od 100 KM (konvertibilnih maraka), sljedećih serijskih brojeva: „{...}“
 - Dvadesetosam (28) novčanica u apoenu od 50 KM (konvertibilnih maraka), sljedećih serijskih brojeva: „{...}“
 - Pet (05) novčanica u apoenu od 100 EURA, sljedećih serijskih brojeva: „{...}“;
 - Tri (03) novčanice u apoenu od 50 EURA, sljedećih serijskih brojeva: „{...}“;

- otvorio papirnu vreću, osiguranu kao dokaz, u kojoj se nalazio novac privremeno oduzet od „(...)“, privremeno oduzet po Potvrđi, Ministarstva unutrašnjih poslova Kantona Sarajevo, broj: ..., iz koje je prisvojio:
 - Dvije (02) novčanice u apoenu od 100 KM (konvertibilnih maraka), sljedećih serijskih brojeva:“{...}“;
 - Devet (09) novčanice u apoenu od 50 KM (konvertibilnih maraka), sljedećih serijskih brojeva: „{...}“;
 - Četrnaest (14) novčanica u apoenima od 200 EURA, sljedećih serijskih brojeva: „{...}“ i drugih neutvrđenih serijskih brojeva;
 - Sedamnaest (17) novčanica u apoenima od 100 EURA, sljedećih serijskih brojeva: „{...}“;
- otvorio papirnu vreću, osiguranu kao dokaz, u kojoj se nalazio novac privremeno oduzet od „(...)“, privremeno oduzet po Potvrđi, Ministarstva unutrašnjih poslova Kantona Sarajevo, broj: ..., iz koje je prisvojio:
 - Stotinu (100) novčanica u apoenu od 100 EURA, sljedećih serijskih brojeva:“{...}“;

čime je opisanim radnjama stekao protivpravnu imovinsku korist u iznosu od 55.809,75 KM.

ČIME SU:

1. Radnjama opisanim tačkom 1. **Adis Prašović i Amer Selak** počinili krivično djelo „Povreda tajnosti postupka“ iz člana 237. stav (1) Krivičnog zakona Bosne i Hercegovine, a u vezi sa članom 29. i 54. Krivičnog zakona Bosne i Hercegovine i krivično djelo „Primanje dara i drugih oblika koristi“ iz člana 380. stav (1) Krivičnog zakona Federacije Bosne i Hercegovine, a u vezi sa članom 31. i 55. Krivičnog zakona Federacije Bosne i Hercegovine;
2. Radnjama opisanim tačkom 2. **Adis Prašović i Amer Selak** počinili krivično djelo „Primanje dara i drugih oblika koristi“ iz člana 380. stav (2) Krivičnog zakona Federacije Bosne i Hercegovine, a u vezi sa članom 31. i 55. Krivičnog zakona Federacije Bosne i Hercegovine;
3. Radnjama opisanim tačkom 3. **Adis Prašović** počinio krivično djelo „Zloupotreba položaja ili ovlašćenja“ iz člana 383. stav (3), u vezi sa stavom (1) Krivičnog zakona Federacije Bosne i Hercegovine, u vezi sa članom 55. Krivičnog zakona Federacije Bosne i Hercegovine;
a sve u vezi sa članom 53. Krivičnog zakona Bosne i Hercegovine.